



15. juli 2011

UKA 2011/61

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara.

Inatsisit tunngaviusut piareersarlugit suliarineqarnissaat aallarnisarneqalereqqullugu Inatsisartut aalajangiiffigisassaattut siunnersuut, taamaattumillu Kalaallit Nunatsinni namminerisamik tunngaviusumik inatsiseqalernissarput siunertaralugu Isumalioqatigiissitamik pilersitsinissaq Inatsisartut aalajangiutissagaat.

(Inatsisartunut ilaasortaq Aqqaluaq B. Egede, Inuit Ataqatigiit)

Tunngavilersuut:

Siunnersuut una aallartiffiussaaq inuiaqatigiittut namminiilivikkumanitta naqissusernissaanut. Inuiaqatigiittut siuariartorpugut. Siuariartorpugut piunasaqartaratta nunatta inuisalu siunissami qanoq angusaqarsimanissaannik. Aamma siuariartorpugut takutittaratsigu, inuiaat amerlanngikkaluarluta eqqarsartaatsikkut qanoq unammillersinnaassuseqartiginerluta. Amerlanngikkaluarluta isummersoqatigiinnikkut, isuma angusaqarnissamut ajugaassutissaasoq pilersittaratsigu, suliasartaalu naammassisaratsigit.

Taamaalioqqinnissatsinnut nukissaqaqaagut. Oqaatsit isummallu qunullersimanatik sassartertut inerititaqartussatuaapput. Isummat taamaattut katersoqqittariaqarpagut. Uppernarsassavarput inuiattut immikkooruteqarluta kiffaanngissuseqarumallutalu namminiilivikkumanerput qasukkartissimanagu.

Inuit Ataqatigiit isumaqarpugut inuiaqatigiittut namminerisamik inatsiseqalernissarput suliaralugu aallartinnissatsinnut piffissanngortoq. Nunatta tunngaviusumik inatsiseqalernissaa siunertaralugu ,- peqqissaarussamik tuaviuussaannngitsumillu naalakkersuinikkut sulineq aallartinneqartariaqarpoq.

Inuiaqatigiittut namminersornermi anguniakkatta saniatigut, alloriarfissaq tulleg inuiaqatigiit nunatsinni namminerisamik inatsiseqalernissaat anguniagassaasoq Inuit Ataqatigiinnit tikkuarparput. Pingaartikkatsigu inuiaqatigiittut namminerisamik inatsisissarput sanarfineqassasoq tuaviuussaannngitsumik. Tunngaviusumik inatsisissaq tassaassanngimmat naalakkersuinikkut allaffissornikkullu kisiat suliarineqarsimasoq. Inuiaat kalaallit namminerisamik inatsisissaat innuttaasut peqatigalugit ataatsimoorussamik ilusilersorneqartariaqarpoq.

Soorlu aamma nunatta nunasiaanermunit Namminersorerulluta Oqartussaalernissatsinnut anguniagaqarnermini sioqutsisumik pilersaarusiorsimasoq. Aamma taamaaliorpugut Namminersorneq pillugu ataatsimiititaliarsuup sulinerata kingorna namminersorneq pillugu inatsisip sukumiisumik suliarineqarsimasup malitsigisaanik inuiaqatigiit nunatsinni Namminersorneq akueralugu eqqummassuk.

Suliasaq imaannaangilaq. Nunatta inuisalu namminerisamik inatsisissaat inuiaqatigiittut nunatsinni qanoq inatsisitigut tunngaveqarluta ulluinnarni inuusaatsikkut tunngaviusumik kinaassusilerneqarfissatta pingaarnersaraat. Suliasaq ataatsimoorluta suleqatigiinnissatsinnik pisariaqartitsivoq.

Inuiaqatigiittut amerlanerpaajungikkaluarluta ukiut ingerlanerini ataatsimoorluta namminiilivinnissatsinnik isuma nukittorsarlugu sukasaqatigiissimavugut. Ullumikkut angusarisatta takutippaat sapertutut misiginata ataatsimoorussigaangatta imaasiiallaannaq allanit atorunnaarsinneqarsinnaanngitsunik pilersitseqatigiissinnaasugut.

Anguniakkatta inernerisariaqarpaa nunatta inuisalu inatsisitigut tunngavissaat pitsaanerpaaq, oqaluttuarisaanitsinnik inooriaasitsinnillu tunngavilik, ullumi nunarsuatsinni pissutsit killiffianut tulluartaq.

Naalackersuisut suliniuteqarnissaannik peqquneqaqqullugit siunnersuuteqarnitsinni naatsorsuutigaarput, Naalackersuisut suleqatigiissitamik suliassamut ilisimasaqarluartunik inuttalimmik pilersitsissasut. Suleqatigiissitatut isumalioqatigiissitap saniatigut inuiaqatigiinni, nunap immikkoortuini arnanik angutinillu, inuusuttunik utoqqaanerusunillu, ilinniakkatigut misilittakkatigullu sapinngisamik siamasissumik tunuliaqutaqartunik isumalioqatigiissitaliaajumaartumut innuttaasut isumaannik tunioraasussanik aammalu isumalioqatigiissitap suliaannik ingerlaavartumik isummersortartussatut toqqartuisoqassasoq siunertaasariaqartoq isumaqarpugut.

Nunatsinni namminerisamik inatsiseqalernissatsinnik anguniagaqarluta sulinissarput kinaassuseqalerfissaraarput. Namminerisamik inatsit tassaasariaqarpoq naqissusiiffissarput, Kalaallit Nunatsinni inuit oqartussaaqatigiinnermik pingaartitsisuunerannik. Nunarsuarmioqatitsinnut uppernarsassavarput inuiaat kalaallit tassaasut naligiimmik isiginnittaaseqarluni inooqatigiinnermik pingaartitsisut. Namminerisamik inatsit tunngaviliissaaq nunarsuarmi inuit killiligaanatit oqaaseqarsinnaatitaanerannik isuma nukittorsaaqataaffigiumagipput.

Nunatsinni namminerisamik inatsiseqalernissarput siunertaralugu Naalackersuisut suliniuteqarnissaannik siunnersuut Inatsisartunut ilaasortat isummerfigisassaattut matumuuna saqqummiuppara. Siunnersuut Saqqummiuppara Inatsisartut Naalackersuisullu isummersoqatigiilluarnissarput neriutigalugu.

Pisorta qarfimmuq aqutsisoqarfimmullu aningaasatigut sunniutissai.

Namminerisamik inatsiseqalernissaq inuiaqatigiit peqataatinnerisigut suliassaammat suleqatigiissitaliornikkut, aammalu Naalackersuisut inatsisissaq pillugu qanoq suliamik ingerlatsinerat apequtaalluni aningaasartuuteqarfigneqassaaq. Aamma Inatsisartut qanoq Naalackersuisunut piunasaqarnerat apequtaalluni suliassap aningaasartuutitaqarnissaa aaliangiisuussammat sioqqullugu eqqoriaruminaappoq.

Inuussutissarsiuteqarfimmuq il. il. aningaasaqarnikkut sunniutit.

Inuussutissarsiuteqarfimmuq aningaasartuutitigut sunniuteqarnissaa naatsorsuutigineqanngilaq.

Innuttaasunut aqutsisoqarfikkullu sunniutit.

Innuttaasut ulluinnarni atugaannut sunniuteqassanganineqanngilaq. Aqutsisoqarfiullu suliap qanoq ingerlanneqarnissaa apequtaatillugu annerusumik minnerusumilluunniit suliassaqartarsinnaanera ilimagineqarpoq. Naatsorsuutigineqarpoq namminerisamik inatseseqalernissatta piareersarneqarnera inatsisilerituunik atuiiffusassasoq. Oqaatigiuminaapporli qanoq annertutigisumik suliassatigut sunniuteqassanersoq.